



ТАҒАЙЫНДАУ

Мемлекет басшысының Жарлығымен Ерлан Аққенжетов Қазақстан Республикасының Энергетика министрі лауазымына тағайындалды.



АЗЫҚ-ТҮЛІК ҚАУІПСІЗДІГІ –
БАСТЫ НАЗАРДА

Сенат Төрағасы Мәулен Әшімбаев Азық-түлік қауіпсіздігі жөніндегі ислам ұйымының Бас директоры Берік Арынмен кездесті. Сұхбат барысында тараптар азық-түлік қауіпсіздігі саласындағы қазіргі сын-қатерлерді еңсеруге және елдің агроөнеркәсіптік кешенін тұрақты дамытуға қатысты мәселелерді талқылады.

Мәулен Әшімбаев өз сөзінде азық-түлік тапшылығы мен аштық қазір жаһандық күн тәртібіндегі ең өзекті мәселелердің бірі екенін айтты. Біріккен Ұлттар Ұйымының мәліметтеріне сәйкес, әлемде 340 миллионнан астам адам азық-түліктің жетіспеуінен зардап шегіп отыр. Ал екі миллионға жуық адам аштықтың алдында тұр.

Осы ретте қазіргідей геосаяси шиеленіс және экологиялық қатерлер жағдайында Қазақстанның бастамасымен құрылған Азық-түлік қауіпсіздігі жөніндегі ислам ұйымының қызметі ерекше маңызға ие болып отыр.

«Президент Қасым-Жомарт Тоқаев азық-түлік қауіпсіздігін қамтамасыз ету Қазақстанның алдында тұрған стратегиялық міндеттердің бірі екенін айтты. Бұл бағытта Азық-түлік қауіпсіздігі жөніндегі ислам ұйымы жаһандық азық-түлік мәселелерін шешу жолында маңызды рөл атқарады. Біз ұйымның гуманитарлық дағдарысқа ұшыраған елдерге, оның ішінде Ауғанстан тұрғындарына көмек көрсету жөніндегі бастамаларын жоғары бағалаймыз», – деді Мәулен Әшімбаев.

Кездесу барысында Мемлекет басшысының тапсырмасымен Қазақстанда ауыл шаруашылығы саласын мемлекеттік қолдау және халықты қолжетімді әрі сапалы азық-түлікпен қамтамасыз ету бағытында жүйелі шаралар қабылданып жатқаны айтылды. Соның аясында Сенат депутаттары еліміздің азық-түлік тәуелсіздігін нығайту мәселесін басты назарында ұстап келеді.

Сонымен қатар тараптар Орталық Азия елдерінің агроклиматтық жағдайы, экологиялық проблемалары және экономикалық байланыстары ұқсас екеніне назар аударып, ортақ тәсілдерді әзірлеу үшін аймақтағы ынтымақтастықты арттыру тетіктерін талқылады.

Сондай-ақ Сенат Төрағасы Бахрейнде ұйымдастырылған халықаралық конференция аясында діни лидерлермен болған кездесулердің қорытындыларына назар аударды және Берік Арынды 2025 жылғы 17-18 қыркүйекте Астанада өтетін «Діндер диалогі: болашақ жолындағы синергия» атты Әлемдік және дәстүрлі діндер лидерлерінің VIII съезіне қатысуға шақырды.

«АСЫЛ МҰРА»
АУДИОЖИНАҒЫНЫҢ ТҰСАУКЕСЕРІ ӨТТІ



Астанада Мемлекеттік кеңесші Ерлан Қариннің қатысуымен қазақ халқының ұлттық ән-күйі мен фольклорлық мұрасы топтастырылған «Асыл мұра» аудиожинағының тұсаукесері өтті.

«Қазақстан» республикалық телерадиокорпорациясы жарыққа шығарған «Асыл мұра» жинағы – Қазақстанның музыка өнері тарихында халықаралық стримингтерде кеңінен таралған ең ірі жинақ. Жоба Ozen музыкалық лейблымен бірге жүзеге асырылды.

Жинаққа «Алтын қорда» сақталған 400 күй, 300 жыр-терме, 400 халық әні мен халық композиторларының әндері, 100 ертегі, 50 бесік жыры, 250 ретро хит ән енгізілді. Аудиожинақтың ерекшелігі – мұндағы шығарманың көбі аутентикалық формада, яғни алғашқы орындаушылары жеткізген түпнұсқа күйінде берілген.

Жобаға енген тандамалы 1 500 аудиожазба Apple Music, Spotify, Yandex Music, YouTube Music сияқты әлемге танымал 100-ден астам музыкалық платформаға жүктелді. Сондай-ақ туындылар «Қазақстан» телерадиокорпорациясының altyuqog.com сайтына енгізілді.

Салтанатты жиында сөз сөйлеген Мемлекеттік кеңесші «Асыл мұра» аудиожинағының

жарыққа шығуы және ұлттық саз өнері мұрасының әлемдік платформаларда қолжетімді болуы төл мәдениетіміздің дамуына тың серпін беретінін атап өтті.

Ерлан Қарин «Мемлекеттік телерадиокорпорацияның қорында ғана сақталған 1 500 түпнұсқа туынды әлемдік музыкалық платформаларда жарияланып отыр. Бұл жоба Мемлекет басшысы Қасым-Жомарт Тоқаев Ұлттық құрылтайдың IV отырысында көтерген Ұлттық цифрлық мұрағат құру жөніндегі бастаманы жүзеге асыруға септігін тигізеді. Мұндай жобалар ұлттық мәдени контентті жүйелеуге жол ашып қана қоймай, өнерпаздардың жана буынына, өскелең ұрпаққа сенімді әрі бай дерек көзі болады. Сондай-ақ жасанды интеллекттің жадын едәуір толықтырады», – деді.

Жинақ еліміздегі ұлттық кітапханаларға, Өнер университеттерінің кітапханаларына беріледі, сондай-ақ еркін саудаға шығарылады.



РЕФОРМА
ЕЛДІҢ БОЛМЫС-БІТІМІН ТҰТАСТАЙ
ЖАҒАРТТЫ

Мәжілістің осы аптадағы жалпы отырысы Мемлекет басшысы Қасым-Жомарт Тоқаевтың «Жаңа Қазақстан: жаңару мен жаңғыру жолы» атты тарихи Жолдауының үш жылдығына арналды. Оған Мәжіліс депутаттарымен бірге омбудсмендер, мәслихаттар мен саяси партиялардың төрағалары, мемлекет және қоғам қайраткерлері, Мәжіліс жанындағы қоғамдық палата мүшелері мен БАҚ жетекшілері қатысты. Отырыста атқарылып жатқан жұмыстар кеңінен пысықталып, реформаларға жоғары баға берілді. Мәжіліс депутаттары Әділетті Қазақстан құру қағидаттарына негізделген қарар қабылдады.

ЕЛДІҢ ЕҢСЕСІН КӨТЕРІП, ҰЛТЫМЫЗДЫ
ҰЙЫСТЫРҒАН ЖОЛДАУ

Қазақстанда әр іс-әрекеттен заң мен тәртіпке негізделген әлеуметтік мемлекеттің айшықты бейнесі айқындалып келеді. Президент Қасым-Жомарт Тоқаев ел тізгінін қолына алған сәттен бергі жүзеге асырып келе жатқан саяси реформаларын іске асыру – мемлекеттік құрылыстың жана тарихи кезеңі саналады. Мәжіліс Төрағасы Ерлан Қошанов өз баяндамасында осыдан тура үш жыл бұрын, 2022 жылғы 16 наурызда, дәл осы залда Мемлекет басшысы Қасым-Жомарт Тоқаев қазақстандықтарға

тарихи Жолдауын жариялағанын атап өтті. Мәжіліс Спикері әлем үшін де, Қазақстан үшін де алмағайып, күрделі сынақтар кезеңінде Президент Жолдауының елдің еңсесін көтеріп, рухын оятқанына, ұлтымызды ұйыстырғанына назар аударды. «Шын мәнінде, Жаңа, Әділетті Қазақстан қол жетпес арман емес. Ол – халқымыздың талап-тілегінен, қоғамның сұранысынан туындаған қажеттілік, өмірдің шындығы. Ал реформалар – жай ғана заңды өзгерту емес, тұтас мемлекет пен қоғамның болмыс-бітімін жаңарту, жаңғырту», – деді Ерлан Қошанов.

(Жалғасы 2-3-беттерде)

Жамбыл АРТЫҚБАЕВ,
профессор:

НАУРЫЗДЫ ЖАҢА ЖЫЛ ЕСЕБІНДЕ
СЕЗІНУІМІЗ КЕРЕК

Сонау тас дәуірінен бастап бүгінге дейін үзілмей келе жатқан көне мейрамның бірі – Наурыз мерекесі. Бойына мейірімділік пен ынтымақты, молшылық пен жаңаруды сыйдырған осы мереке төңірегінде айтылар дау көп, талас та жетерлік. Осы орайда Ұлыстың ұлы күніне орай танымал тарихшы-этнограф Жамбыл Артықбаевпен мейрамның мән-маңызы туралы әңгімелескен едік.

(Жалғасы 5-бетте)



ЖЫЛЫ-ЖЫЛЫ СӨЙЛЕСЕК,
ЖЫЛАН ІНІНЕН ШЫҒАДЫ

Халықтық жыл санауға байланысты алғашқы деректерді сонау VIII ғасырдағы Күлтегін ескерткіштерінен және Махмұт Қашқари еңбектерінен көруге болады. Бұл дәстүр сол ескі заманның өзінде-ақ аңызға айналып кеткен.



ҰМЫТ ҚАЛҒАН
ҰЛТТЫҚ ОЙЫНДАР

Қазақ ұлттық ойындары көп болғанымен, оның біразы ұмытылды. Оған себеп – Кеңес үкіметін құру кезеңіндегі ойындарды «ескінің қалдығы» деп ешкім ескермеді, баспа беттерінде жарық көрмеді.



20 НАУРЫЗ 2025 | БЕЙСЕНБІ

850 МЫҢҒА ЖУЫҚ АЗАМАТ ҚАРЖЫЛЫҚ САУАТ АРТТЫРДЫ

«AMANAT» партиясының «Қарызсыз қоғам» жобасы арқылы 850 мыңға жуық қазақстандық азамат қаржылық сауатын арттырды. Жоба түлектерінің 40%-дан астамы қарыз жүктемесі мен несиелер санын азайтты. Алайда бүгінде азаматтарды интернет-алаяқтардың белсенді әрекетінен қорғау жұмысын күшейту, сондай-ақ қаржы пирамидаларынан зардап шеккен адамдарға көмек көрсету мәселесі аса маңызды болып отыр. Осы мақсатта бүгін «AMANAT» партиясы мен Қаржылық мониторинг агенттігі өзара ынтымақтастық туралы меморандум жасасты. Құжатқа партияның Атқарушы хатшысы Дәулет Кәрібек пен Агенттік төрағасының орынбасары Қайрат Бижанов қол қойды.



Дәулет Кәрібек несие қамытын киген азаматтардың борышын азайту мақсатында бес жыл бұрын Мемлекет басшысы Қасым-Жомарт Тоқаевтың Жарлығымен бірреттік шара ретінде 500 мың азаматтың кепілсіз несиесі кешірілгенін атап өтті. Ал

мәселені жүйелі түрде шешу үшін Президент тапсырмасы бойынша Мәжілістегі «AMANAT» партиясының фракциясы жеке тұлғалардың банкроттығы туралы және кредит беру кезінде төуекелдерді барынша азайту туралы заң әзірледі. Атап айтқанда, 2026 жылға дейін

банктер мен микроқаржы ұйымдары азаматтардың несиелерін коллекторларға сатуына мораторий жарияланды, тұтынушылық қарыздардың ең жоғары сомасы белгіленді, кепілсіз тұтынушылық қарыздар бойынша сыйақының шекті жылдық тиімді мөлшерлемесі төмендетілді және тағы басқа қадамдар жасалды. Қабылданған түзетулер іс жүзінде банктердің емес, қарапайым адамдардың мүддесін қорғайды.

«Қарызсыз қоғам» жобасы қарызға, қаржылық тұрақсыздық мәселелеріне тап болған адамдарды қолдаудың тиімді тетігіне айналды. Осы жобаның тиімділігін Президент те бірнеше рет атап өтті. Өкінішке қарай, көп азамат өзінің қаржылық құқығын білмейді. Жобаға қатысушылар тек оқу барысында ғана өз қарызының артық төлемін біліп жатады. Сондықтан біздің бастамамыз қазақстандықтар үшін нағыз «құтқару шеңберіне» айналды. Жоба жүзеге асырылып келе жатқан екі жыл көлемінде ел аумағындағы 850 мыңға жуық адам қаржылық сауатын арттыру курсынан өтіп, олардың 70 мыңына зангерлер көмек көрсетті. Қаржылық мониторинг агенттігімен өзара бірлескен жұмысымыз профилактикалық және білім беру қызметін күшейтуге,



сондай-ақ жобаға барынша көп азаматты тартуға ықпал етеді», — деді партияның Атқарушы хатшысы.

Сондай-ақ Дәулет Кәрібек «AMANAT» партиясы алдағы уақытта да азаматтардың қарызын қайта құрылымдауға және коллекторлармен туындаған дау-дамайларды шешуге көмектесетінін айтты. Бұл, әсіресе 90 күннен астам уақыт төленбей келген несие берешегі бар адамдарға қатысты. Мұндай азаматтардың саны шамамен 1,6 млн адамды құрап отыр. Жалпы, «Қарызсыз қоғам» жобасы арқылы проблемалық несиелер денгейі 2020 жылғы 18%-дан 2024 жылғы 7%-ға дейін төмендеді.

Қаржылық мониторинг агенттігі төрағасының орынбасары Қайрат Бижанов «AMANAT» партиясымен ынтымақтастық орнатып, қаржылық алаяқтыққа қарсы бірлесіп жұмыс істеудің маңызын атап өтті. Ол күш-жігерді біріктіру қаламы қаржылық жауапкершілікті қалыптастыру және азаматтарды алаяқтардан қорғау жұмысына сенімді серпін беретінін жеткізді.

«Бүгінде қаржы пирамидалары белсенді жұмыс істеп жатыр. Олардың басым бөлігі шетелден басқарылады. Былтырдың өзінде Агенттік 29 қаржы пирамидасын анықтап, 41 онлайн құмар ойын алаңын жойды. Қаржылық алаяқтық белгілері бар 327 чат жабылды. Ондағы азаматтардың жалпы саны 1,5 миллионнан асады. «Кибербақылау» жүйесінде қаржы пирамидасы белгілері бар 15 мыңға жуық сайт пен аккаунт және 12 мың онлайн-казино бұғатталды. Биыл екі айда 11 қаржы пирамидасының қызметі тоқтатылды, 4,5 мың сайт пен аккаунт бұғатталды, әлеуметтік желілерде 13 мың әлеуетті салымшысы бар 6 топ, 4 мыңнан астам онлайн-казино сайттары мен аккаунттары жабылды», — деді ол.

Меморандум шеңберінде тараптар бірлесіп оқыту материалдарын әзірлеуге және таратуға, қоғамды алаяқтардың әрекеттері мен оларды танып-білу тәсілдері туралы жедел хабарлар етуге, алаяқтардың құрбандарына қолдау көрсетуге, сондай-ақ заңнаманы жетілдіру жөнінде ұсыныстар енгізуге ниетті.

Еске сала кетейік, «Қарызсыз қоғам» жобасы 2023 жылы 2 мамырда 12 банктің және 11 мемлекеттік органның қолдауымен бастау алды. Сарапшылардың дәрісінен бөлек, жобаға қатысушылар enbek.kz порталына тіркелу және ЖК ашудан бастап, соттан тыс банкроттықты сүйемелдеу және берешекті өтеу кестесін әзірлеуге дейінгі түрлі сұрақ бойынша кеңес алады. Сондай-ақ оқыту барысында қатысушыларға зангер көмегіне кепілдік беріледі. Олар әр қарыз алушының несие тарихын жеке зерттеп, қарыз жүктемесін жеңілдету бойынша кеңес береді.

Курсқа жазылу үшін qoqamfin.kz сайтындағы нысанды толтыру қажет. Жобаға қатысушылар күндізгі форматта сауатын арттырып, бір топта 50 адамға дейін оқытылады. Дәріс ұзақтығы — 5 жұмыс күні.

ӘЗ-НАУРЫЗ — АДАМЗАТТЫҢ БАСТЫ МЕЙРАМЫ



Жұрттың аузын аққа жеткізіп, жер-жаһанды сері самалға өпкізіп, нұр-шапағатты аямай төккізіп, қиындықтың бәрін өткен жылға өткізіп әлемге өз-Наурыз келді. Жыл басына баланған, жаңару мен жасампаздық бастауы саналған, ырыс-берекенің арқауына айналған Наурыз мейрамын континентіміздегі көптеген халық дәстүрлі мейрамы ретінде ықылым заманнан тойлап келеді. Біраз елде бұл мерекеге мемлекеттік мәртебе беріліп, елге ұзақ демалыс ұсынылады. Біз әлемдегі қандай елдер Наурызда неше күн демалатынын және қалай атап өтетінін анықтадық.

Айхан ШӘРІП

Мәдениет және ақпарат министрлігінің хабарлауынша, Қазақстанда былтырдан бері Наурыз мейрамын атап өтудің жаңа форматы — «Наурызанама» енгізілді. Оған сәйкес, Ұлтың ұлы күні республикамызда он күн бойы — 14-23 наурыз аралығында тойланады. Министрліктің Мәдениет комитетінің түсіндіруінше, «Наурызанама» онкүнділігін әрбір күні қазақ мәдениеті мен қоғамының байлығы мен алуантүрлілігін көрсететін белгілі бір тақырып пен құндылыққа арналады. Бұған дейін, 14 наурызда — Көрісу күні Аман мерекесі, 15 наурызда — «Қайырымдылық күні», 16 наурызда — «Мәдениет және ұлттық салт-дәстүр күні», 17 наурызда — «Шанырақ күні», 18 наурызда — Ұлттық киім күні, 19 наурызда — Жанару күні атап өтілді. Бүгінгі 20 наурызда — Ұлттық спорт күніне, 21 наурыз — Ынтымақ күніне

да бес күн — 21, 22, 23, 24, 25 наурыз күндері демалады. «Наурызанама» — тек Қазақстанның ойлап тапқан жаңашылдығы. Өзге елдерде жыл басы Наурыз негізінен халықтың мереке сипатында өтеді. Қырғызстанда да «Нооруз» мемлекеттік мереке мәртебесін алған. Бірақ заң бойынша қырғыздар 21 наурызда ғана демалады. Әйткенмен, 2025 жылы бұл дата жұмаға тап келетіндіктен, Алатаудың арғы баурайындағы ағайындар қатарынан 3 күн — 21, 22 және 23 наурыз күндері демалады.

Айтпақшы, осы жылы өз-Наурызды Қырғызстан, Тәжікстан және Өзбекстан президенттері бірге тойлайтын болды. Бұл туралы өткен аптада, 13 наурызда Садыр Жапаров пен Эмомали Рахмонның келіссөздерінде белгілі болды. Үш елдің мемлекет басшысы ортақ мейрамды тәжіктің Худжанд қаласында атап өтпек. — Ноорузды бірге мерекелеу — Орталық Азия халықтарының бірлігі мен тату өмірінің символына, ізгі дәстүрге айналады. Біздің ортақ міндетіміз — халықтарымыз арасындағы сенімді нығайту. Шекаралас аудандардағы ынтымақтастықты күшейту бұл бағыттағы маңызды қадам болмақ. Бұл тұрғыда Худжандта Ноорузды бірлесіп мерекелеудің маңызы зор. Шақыру үшін алғыс білдіреміз және қатысатынымды растаймын», — деді Қырғыз Республикасының Президенті С.Жапаров. Бұл мереке Тәжікстанда да көп, әрі кең тойланады. Тәжіктер «Наурузда» 7 күн бойы — 21, 22, 23, 24, 25, 26 және 27 наурызда

демалады. Ал заң бойынша Наурыз мейрамына бұл елде ресми түрде 3 күн демалыс бекітілген.

Тәжік елінің астанасы Наурызды жылда карнавалмен қарсы алатын. Биылғы жылы көше шеруінен бас тартылды, есесіне бұл күні Душанбеде Орталық Азиядағы ең ірі отпашу болмақ. «Наурыз-2025» 19-22 наурыз аралығында кең ауқымда атап өтетіні хабарланды. Оның аясында мәдени іс-шаралар, спорт жарыстары, жастарға арналған жеке бағдарлама жоспарланған. Қала басшылығы жыл басы «Наурыз» 20 наурыз күнгі сағат 14:01-де туатынын ресми хабарлады. Бірақ бүкіл ел бойынша «Наурызды қарсы алу салтанаты» 21 наурызда басталады. Айта кету керек, Тәжікстанда «Наурузго» мемлекеттік мекемесі құрылған, мерекеге арналған халықаралық жиындарды сол өткізеді. Бүкіл әлемнен жастар лидерлерін жинайтын Navruz Youth World Festival жастар фестивалі, Халықаралық туризм фестивалі, Ұлттық тағамдардың фестивалі және басқасы жоспарланған. Негізгі салтанат Худжанд қаласында өтіп, оған Тәжікстан, Өзбекстан және Қырғызстан президенттері қатысатынын хабарланды.

Өзбекстанда да Наурыз мейрамы ұлттық дәстүрлер мен әдет-ғұрыптардан терен тамыр тартып жатыр. Биыл Үкімет «Наурыз» мейрамы үшін қосымша демалыс бермеуге ұйғарды. 2025 жылғы мерекеге кестесі келесідей: 21 наурыз — Наурыз мейрамы күрметіне ресми демалыс, 22 наурыз — сенбі, 5 күндік жұмыс аптасындағылар үшін ғана демалыс, 23 наурыз — жексенбі, баршасы үшін әдеттегі демалыс.

Сонымен бірге Өзбекстан Президенті Шавкат Мирзиёев биылғы 21 ақпанда «2025 жылы Наурыз бүкілхалықтық мерекесін дайындау және өткізу туралы» жарлық (Presidential Decree) шығарды.

«Биылғы жыл — Қоршаған ортаны қорғау және «жасыл» экономика жылы. Оның аясында Наурызды тойлау жаңа, анағұрлым терең мағына мен мазмұнға ие бола түседі. БҰҰ халықаралық мереке деп таныған Наурыздың Жаңа Өзбекстандағы бейбітшілік, достық, келісім мен бірлік рухын нығайтудағы баға жетпес рөлін ескере отырып, ол лайықты деңгейде мерекеленсін. «Құндылығын мәңгілік болсын, Наурыз!» ұранымен бұл мейрам жоғарғы деңгейде, халықтық серуендермен — сайилдермен (сауық-сейіл) кең атап өтілсін», — делінген құжатта.

Жарлыққа сәйкес, «Наурыз бүкілхалықтық мерекесінің идеялық-көркемдік тұжырымдамасы» бекітілді. Ол өзбек тілін, ұлттық құндылықтарды, тарих пен ұлттық ойындарды дәріптеуді, қайырымдылық іс-шараларын, қарияларға құрмет жоралғыларын, жалпыхалықтық хашар (асар) өткізуді, әрбір елді мекенді, көше мен махаланы абаптандыру мен жасылдандыруға тұрғындарды кең тартуды, қыстан шыққан елді көз тартардай көркем етіп безендіруді және басқасын қарастырады.

Табиғат заңдылығымен жыл басы болған, жақсылықтың жарышына айналған Наурыз мейрамын кең атап өтетін елдердің көш басында Өзербайжан тұр. Заң бойынша «Новруз» мейрамына үш күн — 19-21 наурыз күндерінде демалыс берілген. Бірақ өзербайжандар күн мен түн теңелетін бұл мерекені он күннен аз тойлап көрген емес. Өзербайжан Үкіметі 2025 жылғы демалыс күндерінің кестесін өзгертті. Премьер Әли Асадов қол қойған қаулыға сәйкес, «демалыс күндерінің бірізділігін қамтамасыз ету мақсатында» жұмыс күндері саналатын 27

және 28 наурыз тиісінше 10 наурызға және 1 сәуірге көшірілді. Сондай-ақ 30-31 наурыз «Рамазан мейрамы» деп жарияланды. Нәтижесінде, Өзербайжанда 2025 жылы Наурыз мерекесі 20 және 31 наурыз аралығын қамтиды және 12 күн бойғы демалыс, «жалпыхалықтық наурыз қаникулы» енгізілді. Бұл күндерді жұртшылық жақын-жуықтарына қонаққа баруға, ел бойынша саяхаттауға арнайды.

Мәдениеттанушы Ильгар Гусейновтің айтуынша, Новруз өзербайжан халқының ең сүйікті әрі байырғы мерекелерінің бірі. Тиісінше, оны атап өтудің берік дәстүрі қалыптасқан. Жаңа жылды қарсы алуға халық ерте кіріседі. Салтанат 4 ерекше сейсенбіден — «Чершенбеден» басталады. Яғни, өз-Наурызға дейінгі әр сейсенбінің кеші Су күні, От күні, Жел күні және Жер күні аталады, оның әрқайсысы табиғаттың бір құбылыс-стихиясының оянуын білдіреді. Бір қызығы, қазақтар Жарапазаны, немесе америкалық «Хэллоуин» сияқты өзербайжандық балалар дәл Новруз күні үйді-үйді аралап, боялған жұмыртқа, тәттілер жинайды.

Иранда жыл басы «Наурузда» басталады. Бұл елдегі ең елеулі, ірі халықтық мейрам. Биыл ирандық күнтізбе бойынша Наурыз 21 наурызға сәйкес келеді. Ирандық ақпарат құралдары Наурыздың біздің дәуірімізге дейінгі 648-330 жылдан, Ахемендтер әулеті билеген заманнан бері тойланатынын айтады.

Ирандықтар өз-Наурызды дәстүрлі түрде 13 күн қатарынан мерекелейді. Турфирма өкілдері Иранда осы күндері көптеген ұйым, соның ішінде мемлекеттік мекемелер, музейлер және басқасы негізінен ашық болатынын түсіндірді. Тек мектептер балаларды қаникулаға жібереді. Біраз компания қонаққа баруы, саяхаттауы үшін ұжымына толық демалыс береді немесе кезек-кезекпен, ішінара босатады. Содан Наурузда көшелер, мұражайлар және өзге ығы-жығы халыққа толады. Саяхаттауды жоспарлағандар мұны ескергені жөн.

Наурыз мейрамы Түркияда, Солтүстік Кипр түрік республикасында, Қытайда, Ресейде, Түрікменстанда, Украинада, Ауғанстанда, Иракта, Сирияда, Оңтүстік Осетияда, Албанияда, Арменияда, Босния мен Герцеговинада, Солтүстік Македонияда, Монғолияда және басқа да елдерде түрлі деңгейде атап өтеледі. Бірақ ресми түрде мемлекеттік мерекелер тізіміне енгізілмегендіктен, демалыс қарастырылмаған.

Барлығында дерлік мерекелеу дәстүрі ұқсас: бұл күндері бір-біріне қонаққа барады, жауласқандар бітімге келіп, татуласуға тырысады, үй ішінде және сыртта тазалау жүргізіп, ескі-құсқыдан арғылады. Жұртшылық жиналып, ұлттық тамақтан дәм татып, ән айтып, арнайы жағылған алауды айналады, сөйтіп бой-басын отпен аластайды. Арнайы ыдыста дәмді дақылдарды немесе гүлдерді алдын ала өсіріп, бір-біріне сыйлайды, үй ішін сонымен безендіреді. Көктемгі жасөскін табиғаттың түлеуін және жаңа өмірдің басталуын бейнелейді.

Адамзат табиғаттың төл перзенті, ол соған нық тәуелді. Ендіше табиғаттың түлеп, жанаратын, Жер-ананың тон кеудесі жібіп, тас емішегі итін, ғаламшарымызда күн мен түн теңелетін шақ — өз-Наурыз адамзаттың ойдан шығарылмаған, табиғаттың өз сыйлаған басты мерекесі болса керек. Олай болса, Жаңа жылда елдеріміздің шаңырағы биік, керегесі кең, мерекесі ерен, ырыс-берекесі молынан болсын!

Қазақ ұлттық ойындары көп болғанымен, оның біразы ұмытылды. Оған себеп – Кеңес үкіметін құру кезеңіндегі ойындарды «ескінің қалдығы» деп ешкім ескермеді, баспа беттерінде жарық көрмеді. Соңғы жылдары газет-журналдарда ұлттық ойындарды қайта жаңғырту, халықтық педагогиканың бір саласы ретінде мектептердің, балалар мекемелерінің оқу-тәрбие жоспарына енгізу мәселелері қойылып отыр.

ҰМЫТ ҚАЛҒАН ҰЛТТЫҚ ОЙЫНДАР

Әсет ҚАЛИ



Негізінде, ұлттық ойындарымызды осы наурызда ойнауымыз керек. Ойнап қана қоймай, үлкен жарыс қылып, ел біріншілігін өткізу керек. Сол арқылы ұлттық спорттымызды, өнерімізді, дәстүрімізді наурызға тиек етіп дамыта аламыз. Бір ғылыми еңбекте итальян саяхатшысы Плато Карпини 1200 жылдары Қарақорымға барады. Сол кезде естелігінде былай жазады: «Мен барғаннан кейін көктем тойында (яғни, бұны наурыз деп түсінсек болады) үлкен мемлекеттік дәрежеде сайыс өтті. Биік мұнараға жамбы не туды нысанға тігіп қойып, жан-жақтан жиналған атакты мергендер сайысты. Бәрін атып түсірген мергенге «ұлыстың ұлы мергені» деген атак берді» дейді. Міне, бұл орта ғасырда қазақ ұлттық ойындары ауқымды деңгейде қолданыста болғанын көрсетеді, – дейді журналист, этнограф Бекен Қайратұлы.

Журналист өз сөзінде ұлттық салт-дәстүрімізді жаңғырту керек екенін алға тартады. Оның сөзінше, кейбір ескі деректерде бұл ойындарды «көктемгі ойындар» деп те атаған екен.

«АҚ БОРАН» МЕН «ҚАЛТЫРАУЫҚ ҚАМЫР КЕМПІР»

Қазақ халқының ойын-сауық, әдет-ғұрып ойындарының көпшілігі осы ойынмен басталады. Наурыз мейрамында бұл ойындар екі жақтың тартысы арқылы ойналып, қыстың қысылтаң қаттылығын бейнелейтін болған. Наурыз кезінде жақын екі ауылдың келісуі бойынша мерекеге жиналғандар екі топқа бөлінеді. Бірінші топтың аты – «Ақ боран» да, екінші топтың



аты – «Қалтырауық қамыр кемпір». Әр топ ойын басталмас бұрын өздерінің ішінен өнердің барлық саласынан хабары бар ақын, палуан, мерген, күсбегі, шабандоз сияқты ойыншыларын дайындап, сайлап алады да, жиналған қауым екі ауылдың ең үлкен ақсақалының батасын алады. Ойын ең алдымен екі жақтың ақындар айтысымен басталады. Мереке өнердің барлық саласы бойынша осындай қызу тартыспен өтеді.

КИМАҚ

Бұл ойында жіп керіп, сол керілген жіпке әртүрлі ұзындықта сан алуан заттар байлап қояды. Қалам, өшіргіш, кәмпіт, кітап, әртүрлі ойыншық және ойын көңілді болуы үшін бос қағазды да домалақтап орап қояды. Ойынның шарты: бір адамның көзін байлап, ойын бастаушы оның қолына қайшы ұстатып, «Осылардың ішінен қалағаныңды қиып ал», – дейді. Ол адам қиған



затын алады. Егер бірінші рет қия алмаса, екінші рет әрекеттенуге болмайды.

БҰҒЫНАЙ

Ойынға қатысушылар дөңгелене отырады. Ойын жүргізуші балаларды «бірінші бұғынай, екінші бұғынай, үшінші бұғынай...» деп ең ақырғы ойыншыға дейін белгілеп шығады да, кенеттен бір санды атайды (мысалы, жетінші бұғынай). Сол санның иесі орнынан жылдам тұрады да, бір санды айтып, тез орнына отырады. Ол санның иесі де тез тұрып, келесі бір санды айтып орнына отырады. Әрбір айтылған санның иесі «бұғынай» деген сөзді қосып айтып, қайталаумен болады. Егер айтылған санның иесі тұра алмай қалса немесе оның орнына басқа біреу тұрып қойса, онда ойында белгіленген тәртіп бойынша жаза қолданылады (билеу, өлең айту, жұмбақ шешу, т.с.с.). Ол жазасын орындап болған соң бір санды айтып орнына отырады. Ойын жалғаса береді. Әркім өзіне берілген санды ұмытауға, тез қимылдап, жедел шешім қабылдауға жаттығуы керек.

АЙДАП САЛ

Бұл ойынға қатысушыларға шек қойылмайды. Ойыншылар екі топқа бөлінеді. Бірінші топтың ойыншылары сыртқа шығып кетеді де, екінші топтағылар үйде отырып қалады. Ойын жүргізуші сыртта тұрғандардың есімін үйде отырғандардың

әрбіреуіне қойып, өзі белгілеп алады да, сырттан келген ойыншыларға қойылған есімді білдірмейтін жөнінде ескертеді. Енді сырттағы ойыншыларды бір-бірілеп шақыра бастайды. Сырттан келген ойыншы үйдегі ойыншылардың біреуін көрсетіп, яғни өз есімімен аталған ойыншыны табуы керек. Егер таба алмаса, онда ойыншылар орындарына барып отырады. Осылайша, сыртта тұрған ойыншылар жеке-жеке кіріп, өз есімі қойылған жігітті іздеп болғаннан кейін белгілеген адамын дұрыс таппағандар айып тартады. Ал өз есімін тапқандар сол ойыншының қасына барып отырады, айып тартпайды. Айып тартушылар көпшіліктің ұйғаруымен өлең айтады, би билейді. Әйтеуір, білген өнерін көрсетеді. Осылайша, ойын қайталанып біткеннен кейін екі топтың ойыншылары орындарын ауыстырады, ойын қайта басталады.

АЙҚҰЛАҚ

Қасқыр болатын баланың екі шекесіне қияны тіктейтіп, орамалмен маңдайын байлап, арқасына киім-кешекті тығып томпайтып, белін астынан буып «қасқыр» қылып болған соң балаларға жуытпай, аңдай бір бұтаның тасасына жатқызады. Айқұлақ – көктемнен бастап жаз бойы ойнайтын ойын. Айқұлақты ойнау үшін кешке таман жұрт аяғы басылған соң балалар жиналып, өздерінің арасынан үш баланы шығарады: бірі – «қасқыр», бірі – «қойшы», бірі – «ит». Қойшы болатын баланың үстіне жыртық шапан, басына жаман бөрік кигізіп, қолына бір таяқ беріп, «ит»

Айқұлақты ойнау үшін кешке таман жұрт аяғы басылған соң балалар жиналып, өздерінің арасынан үш баланы шығарады: бірі – «қасқыр», бірі – «қойшы», бірі – «ит». Қойшы болатын баланың үстіне жыртық шапан, басына жаман бөрік кигізіп, қолына бір таяқ беріп, «ит» болған баланы қасына ертіп, қойлардың жанына жатқызады.

болған баланы қасына ертіп, қойлардың жанына жатқызады. Қалған бір топ баланы «қой» қылып көгендеп қояды. Біраздан соң «қойлар» дүр етіп үркеді, сол уақытта «ит» те абалап, «қасқырменен» арылдасып қалған кезде «қойшы» да айтқақтап, «лақ-қозыны» айырып қалады. Сөйтіп, «қасқыр» бірде құр кетіп, бірде алып кетіп жүріп, ақырында сол «қойлардың» бәрін де тауысады. Міне, ойын осылай бітіп, екінші басталғанда да сол бұрынғы тәртіппен өтетін болады. Бұл ойын жастарға таза ауада демалуға, көңіл көтеруге, шынығуға, өмірді түсініп, білуге жәрдемдеседі.

БЕЛБЕУ ТАСТАУ

Ойынға жиналғандар дөңгелене шеңбер бойына отырады. Жүргізуші шеңбер сыртында белбеуді қолына ұстап жүгіре басып айналып жүреді де, өзінің көңіліне жаққан ойыншысының артына білдірмей тастауға тырысады (егер ол біліп қойса тастамау керек). Жүргізуші білдірмей тастап кетсе, шеңберді айналып қайтып келіп, белбеуді алады да, артында белбеу жатқан ойыншыны «Орныңды тап» деп белбеумен ұрады. Сөйтіп, шеңберді айналдыра қуалап, қайтып орнына келгенше соғады. Ал ойнаушы белбеуді артына тастап кеткенін біліп қойса, белбеуді ала салып, ойын жүргізушінің өзі босатқан орынға жеткенше қуалайды. Ойын осылай жалғаса береді.

NAVRUZ YOUTH WORLD ФЕСТИВАЛІНЕ ҚАТЫСТЫ

Осы күндері Тәжікстанда Наурыз мерекесіне орай Navruz Youth World Festival бүкіләлемдік жастар фестивалі өтіп жатыр. Іс-шараға 26 елдің делегаттары, соның ішінде Қазақстанның белсенді жастары мен волонтерлері қатысуда.



Халықаралық фестиваль – мәдениеттер тоғысқан, достық пен жанарудың жарқын символына айналған ерекше мереке. Бұл шара тек Наурыз мейрамының рухын дәріптеп қана қоймай, сонымен қатар мәдени алмасуды нығайтуға және БҰҰ-ның тұрақты даму мақсаттарына қол жеткізуге бағытталған.

Фестиваль аясында білім беру, инклюзия, жұмыспен қамту және экология сынды өзекті мәселелерге назар аударылып, жастар саясатының негізгі бағыттары талқыланды. Әрбір күн – жаңа қала, жаңа идеялар мен тың бастамалардың алаңы. Душанбеден бастау алған мерекелік керуен Айти, Пенжакент, Истаравшан және Худжанд қалаларына жол тартып, әр өңірдің өзіндік ерекшеліктерін паш етеді.

Бағдарлама аясында білім беру және пікірталас алаңдары ұйымдастырылып, жас кәсіпкерлерге арналған стартап эрктаналары, спорттық сайыстар мен мәдени ойын-сауық шаралары өткізілуде. Бұл фестиваль жаңа мүмкіндіктер, шабыт пен достық көпірін орнататын бірегей алаңға айналды.

ҰЛТТЫҚ РУХЫМЫЗ АСҚАҚТАР СӘТ

Қазақ күйінің құдіреті тағы бір мәрте асқақтады! «Күй күмбірі» акциясы аясында еліміздің түкпір-түкпіріндегі мектептерде 1 миллионға жуық оқушы мен педагог бір мезетте күй тартып, ұлттық музыканың ұлы дәстүрін дәріптемек. Бұл туралы Оқу-ағарту министрлігі Тәрбие жұмысы және қосымша білім беру департаментінің директоры Ерлан Қалмақов мәлімдеді.



– Қазір білім беру ұйымдарында «Наурызнама» тұжырымдамасына сай түрлі іс-шара ұйымдастырылуда. Солардың ішінде дәстүрге айналған «Күй күмбірі» акциясы ерекше орын алады. 20 наурыз күні сағат 11.00-де барлық мектепте күмбірлеген күй әуені бір уақытта шарықтайды. Бұл шараға 1 миллионға жуық оқушы мен мұғалім қатысады деп күтілуде, – деді департамент басшысы.

Сонымен қатар Ерлан Қалмақов жас ұрпақтың рухани дамуы үшін қолға алынған тағы бір маңызды бастама – «Балалар кітапханасы» жобасы жайында да айтып өтті. Бұл жоба оқушылардың оқу сауаттылығы мен оқырмандық мәдениетін қалыптастырып, олардың ой-өрісін кеңейтуге бағытталған. Оның аясында жас оқырмандар үшін арнайы іріктелген 2 580 кітаптың тізімі бекітілді.

Музыка мен кітап – ұлттың рухани қазынасы. Ал бұл бастамалар – сол бай мұраны келер ұрпаққа аманаттаудың айқын көрінісі!

Кәмила ЕРКІН

AMANAT
MEDIA GROUP

AIQYN

Меншік иесі – «Айқын-Литер» ЖШС

Директор –
Талғат ЕШЕНҰЛЫ

Бас редактор –
Амангелді ҚҰРМЕТ

Гүлзина БЕКТАС –
Бас редактордың
бірінші орынбасары

Ботагөз МАРАТҚЫЗЫ –
Шығарушы редактор

Елдар ҚАБА –
Секретариат меңгерушісі

АЙМАҚТАҒЫ ТІЛШІЛЕР:
Абаал АЛПЫСБАЙҰЛЫ –
Ақмола облысы
Алтынай БАУЫРЖАНҚЫЗЫ –
Алматы қаласы
Саятхан САТЫЛҒАН –
Жамбыл облысы
Әдебиет БЕЛГІБАЙҰЛЫ –
Қарағанды облысы
Назгул НАЗАРБЕК –
Шымкент қаласы
Жаннат ҚАЙЫРҒОЖИНА –
Батыс Қазақстан облысы
Ербақыт ЖАЛҒАСБАЙ –
Қызылорда облысы
Бәни ЖАНЗАҚ –
Атырау облысы

«АЙҚЫН» ГАЗЕТІНІҢ
ЖАЗЫЛУ ИНДЕКСІ:

Кәсіпорындар,
мекемелер үшін – 15102
Зейнеткерлер,
соғыс ардагерлері үшін – 55102
Жеке жазылушылар үшін – 65102

ЖАРНАМА БӨЛІМІ:
8(701) 675-42-14, 8(7172) 72-95-31
reklam.aikyn@gmail.com

ЖАЗЫЛУ ЖӘНЕ ТАРАТУ БӨЛІМІ:
8(717) 804-61-32
podpiska.alt@gmail.com

Газет аптасына 3 рет шығады

Газет «Айқынның»
компьютер орталығында беттелді

ТАРАЛЫМЫ: 40 000

Талсырыс №4571
Астана қ. «Медиа-холдинг «ERNUR» ЖШС
Сілеті көшесі 30,
Тел.: 8(7172) 99-77-77
Алматы қаласы, «Алматы-Болашақ» АҚ
Мұқанов көшесі, 223 Б
Шымкент қ. «ERNUR-print» ЖШС,
Әлімқұлов көшесі 22,
Тел.: 8(7252) 53-06-66, 54-07-47 ішкі 114,